

四庫全書

史部

欽定四庫全書

欽定續通志卷四百二十五

列傳

金三

羅索

和尼  
仲 哈 默音

宗翰

德克德

額圖琿

瓜爾佳實納

赫木頗

阿里

杲

昂

羅索字幹里延完顏部人年二十一代父布達為七水

諸部長太祖克寧江州使羅索招諭係遼籍女真遂降  
伊騰伊罕路達哈藩昭蘇等敗遼兵于布爾罕山復擒  
兩將軍既而伊克尼瑪蘭兩路皆降進克咸州諸部降  
者相繼遼都統耶律鄂爾多以二十餘萬衆戍邊太祖  
趨達嚕噶城次寧江州西召羅索見于軍中使隸左翼  
宗翰軍與尼楚赫縱兵衝其中堅凡九陷陣皆力戰而  
出復與尼楚赫攻黃龍府帝使完顏琿楚博勤和寔古  
納以兵四千助之敗遼兵萬餘于白馬濼宗雄等下金

山縣使羅索分兵二千招沿山逃散之人又與烏楞古  
破耶律聶哱軍于疾藜山取顯州太祖取黃龍府羅索  
請曰黃龍一都會且僻遠苟有變則隣郡相煽而起請  
以所部屯守太祖然之仍合諸路穆昆命羅索為萬戶  
守黃龍府進都統從杲取中京與希尹等襲走達魯和  
尚伊勒希等敗奚王錫默降奚部西節度額哩哱遼主  
自駕鶩灤西走羅索等追至白水灤獲其內庫寶物遂  
與棟摩攻破西京至天德雲內寧邊東勝其官吏皆降

夏人救遼兵次天德候兵托紐布當二百騎敗沒額圖  
瑋復以二百騎往遇伏獨額圖瑋脫歸時久雨諸將欲  
且休息羅索曰吾兵再破若不復往將以我怯即來攻  
我矣乃選千騎與實實巴爾斯往遲明出陵野嶺留巴  
爾斯以兵二百據險守之獲生口問其帥李良輔也登  
高望之夏人恃衆不整方濟水為陣乃使人報幹魯因  
分軍為二更出迭入進退轉戰三十里過宜水幹魯軍  
亦至合擊敗之遼都統達實犯奉聖州壁龍門東二十

五里羅索與卓哩馬和尚等以兵取之生獲達實其衆  
遂降後從宗望追遼帝與芬徹以二十騎候敵敗其軍  
三千人與三山夏人屯兵于哈屯館宗翰遣羅索戍朔  
州築城于霸德山西南二十里遂破朔州西山兵二萬  
擒其帥趙公直其後獲遼帝于伊都谷賜鐵券尼楚赫  
圍太原宋統制劉臻救之羅索擊破其衆十萬于壽陽  
繼于榆次敗宋兵數千宋張灝軍出汾州巴爾斯擊走  
之灝復營文水羅索與托克索巴爾斯與戰灝大敗宗

翰定太原羅索取汾石二州及其屬縣溫泉方山離石  
芬徽降壽陽取平定軍及樂平復招降遼州及榆社遼  
山和順諸縣宗翰趨汴州使羅索等自平陽道先趨河  
南實實薩喇達等連破宋兵降河陽羅索軍至渡河薄  
西京城兵來拒戰實實擊敗之西京降羅索取偃師  
永安軍鞏縣降薩喇達敗宋兵於汜水於是滎陽滎澤  
鄭州中牟相次皆降宗翰已與宗望會軍于汴使羅索  
率師趨陝津攻河東郡縣之未下者羅索破蒲解之軍

二萬盡覆之安邑解州皆降遂克河中府降絳慈隰石

等州宗翰往洛陽使羅索取陝西敗宋將范致虛軍下

同華二州克京兆府獲宋制置使傅亮遂克鳳翔

按續通鑑

云羅索既陷永興引兵侵熙河都監劉惟輔逆擊于新店斬其將黑鋒又侵涇原吳玠擊之羅索敗走同華本傳特舉其成功而言故俱不載宗翰會宗輔代康王命羅索芬徹專事

陝西以博勒和勝額監戰勝額等遇敵于蒲城及同州

皆破之羅索芬徹克丹州破臨真進克延安府遂降綏

德軍及靜邊懷遠等城寨十六復破青澗城宋安撫使



折可求以麟府豐三州及堡寨九降于羅索晉寧所部  
九寨皆降而晉寧軍久不下城中無井日取河水以飲  
乃決渠泄其水城中遂困李位石乙啓郭門降諸將入  
城守將徐徽言據子城戰衆潰出奔獲之與統制孫昂  
皆不屈乃并殺之降定安堡渭平寨及鄜坊二州於是  
羅索博勒和守延安折可求屯綏德芬徹還守蒲州延  
安鄜坊州皆殘破人民存者無幾羅索置官府輯安之  
京兆府叛羅索復討平之遂與阿里布穆里延至三原

額克沁阿古爾擊敗淳化兵羅索攻乾州已築甬道列礮具而州降遂進克邠州陝西城郭已降者輒復叛睿宗以右副元帥總陝西征伐與張浚戰于富平宗弼左翼軍已却羅索時已有疾以右翼力戰軍勢復振宋軍遂敗睿宗以所用犀玉金銀器及甲冑并馬七匹與之

謹按大金國志云金兵自攻陝西大戰有三危范致虛戰于陝府曲端戰于邠州劉錫戰于耀州宋兵皆敗而隴右州郡盡為金有矣史以經營陝西之功歸羅索其以是夫天會八年薨十三年贈

泰寧軍節度使兼侍中加太子太師皇統元年贈開府

儀同三司追封莘王以正隆例改贈金源郡王配享太  
宗廟庭諡莊義子和尼默音實古納

和尼年十七從攻寧江州力戰創甚扶出陣間太祖賜  
之藥親撫慰之其攻濟州敗敵八千與敵遇于信州伊  
喇本陷于陣和尼力戰出之敵遂北敗耶律佛德等于  
潘州及宗翰襲奚王錫默和尼以兵三百敗敵二千從  
攻伊實部破其二營塔喇部族叛率二穆昆突入大破  
之常從羅索圍太原宋將种師中以兵十萬來援和尼

擊敗之大軍至河無船不得渡羅索遣和尼循水上下  
和尼率兵三百先濟大軍于是皆繼之宋將郭京出兵  
數萬趨羅索營和尼從旁奮擊敵亂遂破之師還破敵  
于平陸渡得其船以濟又破敵于張店原時屯留太平  
翼城皆有重敵並破之又分兵取陝西蒲州降留和尼  
鎮之攻鳳翔和尼先登睿宗定陝西和尼為都統進攻  
涇州王開山以兵拒歸路再擊敗之遂降京兆鳳翔諸  
縣羅索薨襲哈濟明安代為黃龍府路萬戶天眷三年

為元帥右都監遷左監軍元帥府罷改安化軍節度使  
歷京兆尹封廣平郡王以正隆例改封代國公進封隋  
國公卒諡貞濟

默音勇力過人善用長矛突戰天眷間克牌印祇候授  
顯武將軍擢符寶郎皇統四年其兄和尼襲濟州路萬  
戶以親管沃濟明安讓默音朝廷從之天德三年為順  
天軍節度使歷河間臨潢尹改博索路兵馬都總管薩  
巴反默音往討之時世宗為東京留守自將討瓜里還

遇默音于常安縣盡以甲士付之世宗還東京完顏福壽高忠建率所部南征軍亡歸東京默音亦率其衆來附即以臣禮上謁遂殺高存福李彥隆等默音福壽忠建率諸將吏民勸進世宗即位拜右副元帥都統白彥敬副統赫舍哩志寧在北京拒不受命默音伐之遇其衆于建州皆不肯戰彥敬志寧遂降大定二年默音率諸軍討斡罕合甲士萬三千人持數日糧輕騎追之是時斡罕新敗于泰州將走濟州默音兵至長瀋南獲其

謀者知敵將由別路邀糧運遂分軍往迎之敵吏吉勒  
扎來降默音用其計因夜亟往邀敵輜重忽大風路暗  
莫相辨比曉纔行三十餘里而都統志寧克寧等已敗  
敵衆二千餘于長濼追殺甚衆默音貪鹵掠不復追以  
故敵得縱去遂涉懿州界陷靈山同昌惠和等縣窺取  
北京西攻三韓縣惟克寧軍追躡默音託馬弱引還懿  
州帝聞之下詔切責以布薩忠義為右副元帥代之赫舍  
哩志寧為右監軍代完顏福壽默音至京師以為同判

大宗正事其子色克暴橫軍中勒歸本貫未幾率賓路  
軍士珠勒呼告色克寄書與默音謀反有司并上其書  
世宗察其誣詔鞠珠勒呼誅之初斡罕方熾帝使温特  
赫阿嚕岱守古北口及斡罕敗于陷泉入于冀中率諸  
奚攻古北口襲殺士卒甚衆阿嚕岱坐除名詔默音芬  
徹烏哩頁富察通以兵三千會舊屯兵擊之擒賊黨明  
安和卓未幾斡罕平乃還七年出為北京留守改東京  
留守封榮國公十一年薨默音性忠厚善擊毬射獵雖



智略不及其父而勇敢肖之

仲本名實古納體貌魁偉通女真契丹漢字其兄幹魯

按前後傳羅索子無名幹魯者考續通鑑宋建炎二年金人侵普寧知軍事徐徽言敗之斬羅索之子而不載其名豈所謂幹魯者即其人歟愛仲才欲使通吏事每視事常在左右

遇事輒問之應對如響皇統初克護衛授世襲穆昆天德元年攝其兄和尼濟州萬戶部內稱治除濱州刺史母憂起復知積石軍事轉同知河南尹正隆六年伐宋為神勇軍副都總管還除同知大興尹將兵二千益遵

化屯軍備契丹遷西南路招討使兼天德軍節度使政  
尚忠信決獄公平蕃部不敢寇邊召為左副都檢點宿  
衛嚴謹每事有規矩後來者守其法莫能易也大定五  
年宋人請和仲為報問使仲請與宋主相見禮儀至宋  
一一如禮正隆用兵宋人執商州刺史完顏守能至是  
仲取守能與俱還帝嘉之轉都點檢兼侍衛親軍都指  
揮使遷河南路統軍使賜廢馬金帶玉吐鶻以罪解職  
久之起為西北路招討使改北京留守卒

哈里羅索族子體貌豐偉善用稍從羅索徙舒吉鄂特  
又從羅索追及遼主于朔州阿敦山遼主從數十騎逸  
去羅索遣哈里及珠敦往見遼主諭之使降遼主已窮  
威待于阿敦山之東羅索因獲之賞哈里金銀幣帛睿  
宗經略陝西哈里戰却吳玠軍于涇邠之南尋遣修棧  
道宋人恐棧道成以兵來拒哈里破之天眷元年擢宿  
直將軍與定宗磐宗雋之亂再遷廣威將軍歷武寧軍  
節度使廣寧尹卒

宗翰本名尼瑪哈薩哈長子年十七以勇聞及議伐遼與太祖意合為右軍大敗遼人于達嚕噶城天輔五年四月宗翰奏曰遼主失德中外離心我朝興師大業既定而根本勿除後必為患今乘其釁可襲取之時不可失太祖然之即命諸路戒備軍事五月戊戌射柳宴羣臣太祖酌酒飲宗翰曰今議西征若謀元帥無以易汝汝當治兵以俟師期尋為伊拉齊貝勒副普嘉努西襲遼帝不果行十一月宗翰復請曰諸軍久駐人思自奮

馬亦壯健宜乘此時進取中京於是烏赫哩貝勒杲都  
統內外諸軍普嘉努宗翰宗幹宗磐副之宗峻領哈濟  
明安皆受金牌伊都為嚮導進克中京宗翰復率偏師  
趨北安州與羅索圖克坦綽里合兵大敗奚王錫默朮  
安遂降宗翰駐軍北安遣希尹經略近地護遼護衛耶  
律實埒訥知遼主獵于鴛鴦濼殺其子晉王額魯溫衆  
益離心西北西南兩路兵馬皆羸弱不可用宗翰使諾  
延溫都伊喇保報都統杲杲使瑣都與伊喇保回報曰

頃奉詔旨不令便趨山西當審詳徐議時宗翰已整衆  
俟兵期及瓊都至知杲無意進取恐失機會即決策進  
兵復使伊喇保往報都統宗幹勸杲當如宗翰策杲意  
乃決約以奚王嶺會議宗翰至奚王嶺與杲會杲軍出  
青嶺宗翰軍出瓢嶺期于羊城灤會軍宗翰以精兵六  
千襲遼主聞遼主自五院司來拒戰宗翰倍道兼行一  
宿而至遼主遁去使希尹等追之西京復叛耿守忠以  
兵五千來救至城東四十里富察烏里固納先擊之斬

首千餘宗翰宗雄宗幹宗峻繼至宗翰率麾下衝擊其中使餘兵從旁射之守忠敗走宗翰弟札巴台戰沒後贈特進宗翰已撫定西路州縣部族謁太祖于行在所遂從取燕京燕京平七年太祖以燕京與宋人還軍次鴛鴦灤不豫將歸京師以宗翰為都統齋貝勒昱德特貝勒幹魯副之駐軍雲中太宗即位宋人來請割諸城宗翰奏言宋人不歸我叛亡阻絕燕山往來道路後必敗盟請勿割山西郡縣太宗曰先皇帝嘗許之矣當與

之諸將獲耶律瑪格宗翰歸之京師詔以馬七百匹給宗翰軍以田種千石米七千石賑新附之民仍度地以居之宗翰請分宗室等兵討諸部詔別給精銳五千宗翰朝太祖陵入見奏曰先皇帝征遼之初圖宋協力夾攻故許以燕地宋人既盟之後請加幣以求山西諸鎮先皇帝辭其加幣盟書曰無容匿逋逃誘擾邊民今宋數路招納叛亡厚以恩賞累疏叛人姓名索之一無所致盟未期年已如此萬世守約其可望乎且西鄙未寧



割付山西諸郡則諸軍失屯據之所將有經畧或難持  
久請姑置勿割太宗悉如所請時幹魯棟摩宗望俱請  
伐宋於是安班貝勒果領都元帥居京師宗翰為左副  
元帥自太原路伐宋發自河陰降朔州克代州圍太原  
府宗望自河北趨汴久不聞問宗翰乃留尼楚赫等圍  
太原自率師而南降定諸縣至澤州宋使至軍中始知  
割三郡講和事詔宗翰取文水及孟縣復留尼楚赫圍  
太原宗翰乃還山西宋少帝誘蕭仲恭貽書伊都以興

復遼社稷動之仲恭獻其書詔復伐宋八月宗翰發自西京九月克太原執宋經略使張孝純等十一月甲子宗翰自太原趨汴降威勝軍克隆德府遂取澤州薩喇達等先已破天井關進逼河陽破宋兵萬人降其城宗翰攻懷州克之丁亥渡河閏月宗翰至汴與宗望會兵宋約畫河為界復請修好不從丙辰尼楚赫等克汴州辛酉宋少帝詣軍前舍青城十二月癸亥少帝奉表降詔元帥府曰將帥士卒立功者第功行賞其沒于王事

者賜贈官爵厚卹其家使曷就軍中勞賜宗翰宗望明年四月以宋二主及宗族四百七十餘人及珪璋寶印袞冕車輅祭器大樂靈臺圖書與大軍北還七月賜宗翰鐵券賜予甚厚宗翰奏河北河東府鎮州縣請擇前資官良能者任之以安新民乃遣耶律暉等從宗翰行詔黃龍府路南路東京路於所部各選如耶律暉者遣之宗翰遂趨洛陽宋董植以兵至鄭州鄭州人復叛宗翰使諸將擊董植軍復取鄭州遂遷洛陽襄陽潁昌

汝鄭均房唐鄧陳蔡之民于河北而遣羅索平陝西州  
郡是時河東寇盜尚多宗翰乃分留將士夾河屯守而  
還師山西昏德公致書請立趙氏奉職修貢宗翰受其  
書而不答康王遣王師正奉表密以書招誘契丹漢人  
獲其書奏之太宗下詔伐宋河北諸將欲罷陝西兵併  
力南伐河東諸將不可曰陝西與西夏為隣兵不可罷  
宗翰曰初與夏約夾攻宋人夏人弗應而耶律達實在  
西北交通西夏吾舍陝西會師河北彼必謂我有急難

宜先事陝西畧定五路既弱西夏然後宋可取也議久不決奏請于太宗太宗曰康王當窮其所往而追之俟平宋當立藩輔如張邦昌者陝右之地亦未可置而不取於是羅索芬徹帥師勝額博勒和監戰平陝西尼楚赫守太原耶律伊都留西京宗翰會東軍于黎陽津遂會睿宗于濮進兵至東平宋知府權邦彥棄家宵遁降其城以官倉金幣分給諸軍襲慶府來降宋知濟南府劉豫以城降于達蘭乃遣巴爾斯烏凌阿托雲馬武襲

宋主于揚州至城下宋主已於前一夕渡江矣時宗弼等分道南伐取建康入杭州宋主入海阿里富埒瑋等自明州行海追之弗及宗弼乃還其後宗翰欲用徐文策伐江南睿宗宗弼議不合乃止

按大金國志宗翰於天會中用高慶裔計

立劉豫大索兩河之民令諸郡置牢地竊盜及一錢以上者死試舉人于白水泊大失士心此類傳皆不書附識于此初太宗以舍音為安班貝勒天會八年舍音薨久

虛此位而熙宗宗峻子太祖嫡孫宗翰朝京師遂與宗幹希尹定議入言于太宗請之再三太宗以宗翰等皆

大臣義不可奪乃從之立熙宗為安班貝勒宗翰為古倫右貝勒兼都元帥熙宗即位拜太保尚書令領三省

事封晉國王乞致仕不許天會十四年薨

按續通鑑載左丞相高慶

裔以賊下獄宗翰乞免為庶人以贖其罪金主不許斬慶裔于市宗翰之黨連坐者甚眾乃志悶絕食而死本傳諱而不載 追封周宋國王正隆二年例封金源郡王大定

間改贈秦王諡桓忠配享太祖廟庭孫秉德色克秉德入逆臣傳色克累官同知哈斯罕節度使大定初除刑部侍郎克都統與副統完顏布呼自東京先赴中都輒

署置官吏私用官中財物世宗至中都事覺詔寬減色  
克除名布呼削兩階解職二年起為大宗正丞除祁州  
刺史坐賊枉法當死詔杖一百五十除名家徙鄜州久  
之起同知興中尹遷唐古部族節度使歷開遠順軍色  
克前在雲內受賊御史臺劾奏世宗謂宰臣曰色克今  
三犯矣蓋其資質鄙惡如此今強幹吏鞫之獄成法當  
死以其祖有大功特免死杖一百五十除名久之復起  
為勸農副使



德克德溫特赫部人祖哲克訥父阿固岱世為和倫水部長德克德年二十餘代領父穆昆攻寧江州敗遼援兵獲甲馬財物攻破奚營回至韓州遇敵二千人擊走之烏楞古與遼人戰于咸州兵已却德克德以本部兵力戰諸軍復振遂大破之呼岱巴岡之役伊里布貝勒陷敵中德克德援出之攻黃龍府身被數創授明安天輔七年從帝至山西病卒天眷中贈光祿大夫

額圖琿溫特赫部人年十七從薩哈威泰等討平諸部

皆身先力戰從烏色禦高麗於海蘭甸為前鋒率三十人夜渡海島襲高麗屯兵焚其營柵戰艦大破之遂下圖吉城而八城皆下功最又擊敗遼兵於寧江州之東門以功授穆昆從攻黃龍府力戰身被數十創竟登其城後與鄂蘭沙津援照蘇城乘其不備夜過伊圖水急擊詰朝大敗之幹魯上其功賜幣與馬天輔四年卒遣使弔祭額圖琿為人孝悌好施惠健捷善弋獵至角觝擊鞠咸精其能

瓜爾佳實訥隆州納爾琿河人祖阿哈率所部來歸獻  
器用甲仗父布爾噶蘇襲本部貝勒從太祖伐遼授世  
襲明安親管穆昆為海蘭路都統實訥長身多髯善騎  
射通女真契丹漢字隨父見太祖命佩金牌總領左翼  
護衛西京未下實訥獲城中生口知城中人求救於外  
都統府得為之備却其救兵遂下西京自燕京還過盤  
尼納遇敵於隘實訥身先士卒射殺先鋒二人敵潰走  
從攻和尚原出仙人關宋兵據險實訥選麾下五十人

與戰克之與吳玠相拒烏哩頁行陣不整吳玠乘之實  
訥領兵逆戰敵大敗計前後功襲其父明安穆昆宗弼  
復取河南陝西宋人欲潛兵襲取石閨諸營實訥自渭  
南大禹鎮敗其伏兵除華州防禦使入為工部侍郎遷  
本部尚書改平涼尹昭義軍節度使大定初卒

赫木頗珠卜奇水錫默部人性忠直寬厚重節義勇於  
戰父阿古圖贈金吾衛上將軍穆宗時赫木頗內附先  
遣子寧嘉間道送款遂使和勒端與赫木頗合軍攻降

諸部因領其衆與弟和摩爾噶歡塔姪阿里等攻下諸城又從薩哈破烏塔城穆宗屢賞之破高麗戍兵與碩碩歡討平諸部富察部雅里貝勒與其兄弟和拜松科等欲叛歸遼赫木頗執之送於康宗賜賚甚厚破高麗海蘭甸及下托囉城有功天輔六年卒天眷中贈銀青光祿大夫

阿里父歡塔穆宗時與兄赫木頗和摩爾噶皆內附數有戰功阿里年十七從和摩爾噶討卓多獲其弟薩勒

扎歡塔攻高麗於穆爾茂甸力戰久之阿里挺鎗馳刺其將於陣中敵遂潰復敗敵兵取其二城高麗兵復入寇以我兵屯守要害不得進乃還阿里追及於海蘭水乘敵走水上殺略幾盡遂合兵於碩碩歡道遇敵兵五萬擊走之又破敵七萬碩碩歡厚賜之從哈薩額特布攻圖吉城阿里鑿墉為門會暮不可入至旦遂取其城額特布賜以被甲乘馬從太祖下寧江州授明安又從攻信州賓州皆克之遼人來攻貝勒和索哩城阿里率

百餘騎往救以兵少令軍士裂衣多為旗幟出山谷間  
遼兵望見遯去蘇復州叛衆至十萬旁近女真皆保於  
太尉和碩家築壘為固敵圍之數重守者糧芻俱盡夜  
縋二人出告急於阿里阿里赴之內外合擊破其衆於  
必爾罕水上勦殺幾盡契丹奚人聚舟千艘將入於海  
阿里以二十七舟邀之中流矢臥舟中中夜始蘇敵船  
已入王家島即夜取海路追及之再中流矢力戰不退  
竟破之盡獲其舟於是蘇復州博索路皆平攻顯州下

靈山縣取梁魚務敗伊都兵功皆最後與蘇都哩屯高州契丹扎古雅糾堅合興中兵數萬攻和爾台寨阿里以八穆昆兵救之和爾台先往敗於城下阿里指陣前緋衣者二十餘人曰此必賊酋也麾兵奮擊皆殺之餘衆大潰來川隰川兵圍和爾台城聞阿里來救即解圍去棟摩討張覺有兵出樓峯口山谷間阿里蘇都哩呼拉布三明安擊敗之再敗平州兵及伐宋阿里別擊敗宋兵明年再伐宋至保州中山累破之進圍真定阿里



與羅索赫嚕乘風縱火焚其樓櫓諸軍畢登克其城渡  
河諸將分出大名境阿里破之敵盡殪遂圍汴汴中夜  
出兵來焚攻具阿里與穆昆察遜伊克禦之其衆大潰  
還攻降趙州天會六年伐宋主取陽穀莘縣敗海州兵  
八萬海州降破賊船萬餘於梁山泊招降滕陽東平泰  
山羣盜盜攻范縣擊走之獲船七百艘宗弼下睢陽令  
與烏雅富琦瑛先以二千人往招壽春具舟淮上連破  
宋主宗弼至江寧阿里富琦瑛別降廣德軍先趨杭州

敗宋伏兵二千宗弼至杭宋主走明州阿里與富琦瑋以精騎四千襲之破東關兵濟曹娥江敗宋兵於高橋鎮至明州失利乃退軍餘姚宋主自昌國走溫州阿里由海路追三百餘里弗及遂隳明州與宗弼俱北歸睿宗經略陝西阿里先取渭州睿宗趨熙河阿里與綏赫韓常為前軍十二年與高彪監護水運宋以舟師阻亳州河路擊敗之獲其將蕭通破連水寨盡得其大船遂取連水軍招徠安輯之天眷間盜據石州阿里往討克其

城石州平宗弼再伐宋阿里已老督造戰船宋稱臣詔  
賜阿里錢千萬自結髮從軍大小數十戰尤習舟楫江  
淮用兵無役不從為德喙勒部節度使歷順義泰寧軍  
歸德濟南尹天德初致仕加特進封王正隆例封韓國  
公召赴闕命造戰船以疾薨諡智敏阿里性忠直多智  
略兄弟相友愛家故饒財以已明安及財物盡與弟阿  
布哩弟不肯受逃避歲餘阿里終與之

朶本名薩里罕安帝六代孫泰州博勒和之族和勒博

繖之子雄偉有才略太祖愛之博勒和為泰州都統宗  
族皆隨遷杲嘗為太祖養子獨得不遷仍居按春水宗  
翰宗望既克汴分遣諸將定河北左都監棟摩攻雄州  
李成棄城走杲邀擊大破之雄州遂降睿宗經略山東  
留杲於河上真定有賊象自稱元帥大王杲擊破其象  
斬之從平陝西降德順軍及涇原路鎮戎軍進平熙河  
降甘泉等二堡遂取保川城同瓚都討平河外降寧洮  
安隴二寨并降下河及樂州西寧於是木波族長等皆

迎降攻慶陽降其城慕洧以環州來降時宗弼軍敗於

和尚原帝褒美杲而戒勵宗弼睿宗已定陝西留兵屯

衝要使杲總之居無何請收劔外十三州與宋王彥之

軍七千人

續通鑑作  
三千人

遇於沙會灤敗之遂克金州連破

吳玠諸軍於饒風關取真符縣及洋州入興元府敗吳

玠於固鎮擒其兩將

按續通鑑薩里罕破饒風關至金  
牛鎮為劉子羽吳玠兵所扼乃由

詳谷北去無戰於固  
鎮事與本傳稍異

天會十四年為元帥右監軍天眷

三年

按宗元通鑑及熙宗為珠復河南並  
在天眷三年此訛作二年謹改正

宗弼復取河

南杲自河中出陝西至鳳翔擊走宋軍在京兆西者甚衆諸將以暑雨欲駐軍且聞宋兵九萬會於涇州都元帥遣河南步卒來會軍杲留諸將屯環慶以輕騎敗宋兵於涇州追至渭州大敗之未幾為右副元帥皇統三年封應國公賜賚甚厚海陵升蒲州為河中府以杲兼河中尹自陝西入朝從容言曰唐建成不道太宗以義除之即位後力行善政後世稱賢陛下以前主失德大義廢絕宜行善政如唐太宗海陵聞言色變既而進封

國王從行官吏皆賞之海陵忌杲久握兵權頗得士心以爲行臺左丞相兼左副元帥又恐不奉命陽尊以殊禮使係屬籍以玉帶璽書賜之杲至汴詔諭行臺右丞相右副元帥大臬無使杲預軍事臬久在河南將帥畏而附之杲始至勢孤爭事不得白於朝大臣知海陵旨報曰如梁王教及詔使至汴還臬有附奏杲不得預聞人皆知海陵使臬圖之矣會海陵忌遼王舍音諸子及宗義等元帥府令史約索希旨誣杲父子并宗義穆里

延等謀逆學杲手署及印文詐為契丹小字書從左都  
監瓚都上變封題已經開折書紙作白字隱約若曾經  
水浸致字畫分明者稱其子宗安於宮門外遺此書約  
索拾得之有司鞠問宗安曰使真有此書安得於朝門下  
遺之竟不服而死乃寘薩古於爐炭上笞掠宗義皆誣  
服使色瑋瑋殺杲於汴族其家而無寫書及傳書者主  
名有哲格者能契丹小字舊嘗從杲特末者陝西舊將  
嘗以左副元帥事馳驛赴闕二人皆族誅杲親屬坐死



者二十餘人魯王

按烏哲世祖子宗室表及烏哲傳皆作封魯王此訛作路謹改烏哲

孫頁嚕侯杲於汴亦執而殺之海陵不問遷約索同知博州事後與蕭裕謀反伏誅大定間詔復杲官爵追封金源郡王諡莊襄配享太宗廟廷

昂本名瓊都景祖弟伯赫之孫咱斡之子幼侍太祖太祖令數人兩兩角力昂連仆六人太祖喜曰汝吾宗弟也自今勿遠左右賜金牌令佩以待年十七從太祖伐遼及平燕策功賜甲第一區天會二年南京叛軍帥棟

摩遣昂分兵討之宗望伐宋承制以為河南諸路兵馬都統及攻汴州宗弼與昂以兵三千為前鋒比暮昂先以兵千人馳入北門宗望至汴令棟摩達蘭等屯於城之東北隅遣昂等率輕騎環城巡邏昂所領止八穆昆遇敵萬人與戰敗之七年大軍渡江敗宋兵於江上帥府遣昂等以兵追宋主宋主入會稽若為堅守計有兵數千列陣於郭東竹葦間諸將欲擊之昂曰此詐也不若急攻城不然將由他門逸去諸將猶豫未決而宋主

果出他門以單舟入海宗弼經略西秦遣昂與薩里罕  
領兵八千攻取河西郡縣昂等遂取寧洮安隴二寨進  
至河州其通判率士民迎降攻樂州其都護及河州安  
撫使郭寧偕降復進取三寨至西寧州都護許居簡以  
城降吐蕃酋長之孫趙鈐轄率其所部木波酋領五人  
來降昂別領軍四千往積石軍降其軍及所部五寨官  
吏追吐蕃鈐轄等十二人至廓州招之不下攻取之天  
眷元年授鎮國上將軍除東平尹明年夏宋將岳飛以

兵十萬來攻東平東平軍五千倉卒出禦時桑柘方茂  
昂使多張旗幟於林間為疑兵自以精兵陳於前飛不  
敢動相持數日而退昂勒兵襲之至清口飛象泛舟逆  
水而去時霖雨晝夜不止昂附水屯營夜將半促象北  
行諸將皆諫昂怒不應鳴鼓督之遂棄營去是夜宋人  
來劫營無所得而去諸將問故昂曰沿流而下者走也  
泝流而上者誘我必追也今大雨泥淖彼舟行安我陸  
行勞士卒飢乏弓矢敗弱我軍居其下流勢不便利其

襲我必矣衆皆稱善岳飛以兵十萬圍邳州甚急城中兵纔千餘守將懼遣人求救昂曰我嘗至下邳城中西南隅有塹深丈餘可速實之守將如其教填之岳飛果自此穴地以入知有備遂止昂舉兵以為聲援飛乃退在東平七年改益都尹遷東北路招討使改崇義軍節度使遷會寧牧天德初改安武軍節度使遷元帥右都監轉左監軍授上京路額勒敏哈爾琿河世襲明安海陵曰汝有大功一明安不足酬也益以四穆昆昂以三

穆昆讓其族兄弟拜樞密副使轉太子少保進樞使尚書左丞相久之拜太尉封瀋國公進太保判大宗正事封楚國公累進封莒衛齊兼樞密使太保如故海陵南伐分諸路軍為三十二總管分隸左右領軍大都督府遂以昂為左領軍大都督世宗即位遼陽昂使人殺皇太子光英於南京遣其子宗浩與其婿輝罕等奉表賀登寶位大軍北還昂恐宋人躡其後即以罷兵移書於宋二年入見世宗慰勞之進封漢國公拜都元帥太保

如故置元帥府於山東經畧邊事未幾奉遷睿宗皇帝  
梓宮於山陵以昂為勅葬使事畢還山東三年召至京  
師以疾薨昂在海陵時縱飲沈醉海陵常面戒之得間  
輒飲如故大定初還自揚州妻子為置酒私第未數行  
輒臥不飲其妻大氏海陵從母姊也怪而問之昂曰吾  
本非嗜酒者但向時不以酒自晦則汝弟殺我久矣今  
遭遇明時正當自愛聞者稱之睦於兄弟尤善施予親  
族貧困者必厚給之子宗浩自有傳

欽定四庫全書



欽定續通志



欽定續通志卷四百二十五

欽定四庫全書

欽定續通志卷四百二十六

列傳

金四

盧彥倫

毛子廉

李三錫

孔敬宗

李師夔

沈璋

劉彥宗

時立愛

韓企先

鄺瓊

李成

孔彥舟

徐文

施宜生

盧彥倫臨潢人遼天慶初蕭貞一留守上京置為吏以材幹稱時臨潢多盜城中兵無統屬府以彥倫為材薦授殿直勾當兵馬公事遼兵敗于珠赫店還至臨潢散居民家令給養之軍士縱恣侵擾留守耶律徹格爾不能禁戢衆莫敢言彥倫獨極論之天輔四年從留守托卜嘉出降授夏州觀察使權發遣上京留守事師還托卜嘉以城降

按太保紀托卜嘉之降在天輔四年五月時以天暑旋師無降而復叛之事核之遼

史亦同意者逆命未幾旋即撫定故從畧耶

彥倫乃率所部逐托卜嘉盡殺

城中契丹遣使來報未幾遼將耶律瑪格以兵攻臨潢  
彥倫拒守者七月會援兵至解圍去天會二年知新城  
事城邑初建彥倫為經畫民居公宇皆有法改靜江軍  
節度留後知咸州烟火事尋授靜江軍節度使天眷初  
行少府監兼都水使者充提點京城大內所彥倫性機  
巧能迎合悼后意由是頗見寵用歲餘遷侍衛親軍馬  
步軍都指揮使為宋國歲元使改禮部尚書加特進封

郇國公天德二年出為大名尹明年詔彥倫營造燕京宮室以疾卒子璣終左宣徽使孫亨嗣為莒州刺史曲盡友愛之道當世稱之

毛子庶本名八十臨潢長泰人材勇善射遼季羣盜起募勇士子庶應募遼主召見賜甲仗率百人會所在官兵捕盜以功授東頭供奉官天輔四年遣穆昆辛額特埒伊喇庫色勒招諭臨潢子庶率戶二千六百來歸令就領其眾佩銀牌招未降軍民盧彥倫怒子庶先降

按

祖紀天輔四年六月托卜嘉以城降六年七月毛八十  
率二千餘戶降考之遼史前後年月正相符合今彥倫  
傳既云從留守托卜嘉出降而本傳  
又云怒子彥先降紀事恐有謬誤 殺子廉妻及二子

使健將孫延壽引騎兵二千伺取子廉子廉與搏戰生  
擒之餘衆潰去天會三年除上京副留守久之蕪鹽鐵  
事天眷中除燕京麴院都監遼王宗幹為宰相曰子廉  
之功十倍彥倫在臨潢十餘年吏民畏愛如一日誰能  
及此時盧彥倫已除節度使故引以為比俄除寧昌軍  
節度使海陵弒熙宗子彥歎曰曾不念國王定策之功

耶乃致仕大定二年卒

李三錫字懷邦錦州安昌人以貴得官遼季盜攻錦州

州人推三錫主兵事設機應變城賴以完錄功授左承

制遼主走天德三錫將兵保白雲山金兵次來州

按金地理

志萊州隸山東東路濟南府在宋為東萊郡時方攻燕京豈能及此考北京大定府下有瑞州即遼之來州也

本傳誤來作萊謹據改

三錫以其衆降攝臨海軍節度副使參預

元帥府軍事改知嚴州宗望伐宋三錫領行軍明安敗

郭藥師軍於白河進官汝州防禦使再克汴京三錫從

棟摩護宗二主北歸復知嚴州改歸德軍節度副使尋授慶州刺史三遷武勝軍節度使察廉第一遷三階改安國軍節度使除河北西路轉運使致仕三錫政事強明所至稱治世宗舊聞其名大定初起為北京路都轉運使制下而三錫已卒

孔敬宗字仲先其先東垣人石晉末徙遼陽遼季敬宗為寧昌劉宏幕官烏楞古兵至境上敬宗勸劉宏迎降遂以敬宗為鄉導拔顯州以功補順安令天輔二年詔



敬宗與劉宏率懿州民徙內地授世襲明安知安州事  
將兵千人從宗望伐宋汴京平即命守汴遷靜江軍節  
度使歷石辰信磁四州刺史階光祿大夫其後以敬宗  
從軍積勞除寧昌軍節度使累徙歸德軍致仕大定二  
年卒

李師夔字賢佐奉聖永興人少倜儻有大志以廕入仕  
為本州麴監天輔六年太祖襲遼主于鴛鴦灤郡守委  
城遁去衆無所屬請師夔主郡事師夔許之乃搜卒治

兵都古爾訥引兵至師夔與其故人沈璋密謀出降即率親信十數輩出城見伊都與之約曰今已服從願無以兵入城及俘掠境內伊都許諾詔授武定軍節度使沈璋佐之俾招未附者許便宜從事明年加左監門衛大將軍劇賊張勝以萬人逼城師夔度眾寡不敵偽與之和日致饋給勝信之師夔乘其不備使人刺殺勝以其首徇曰汝輩皆良民脅從至此今元惡已誅可棄兵歸復其所賊眾大驚皆散去別賊焦望天尹智穆率兵

數千來寇師夔設伏歸路使人反間之望天先引去智  
穆勢孤亦還過伏而敗遂執斬之是後賊不敢入境以  
勞遷靜江軍節度留後累遷武平軍節度使歷東京路  
陝西東路轉運使致仕封任國公卒

沈璋字之達奉聖州永興人學進士業都古爾訥軍至  
上谷璋與李師夔迎降明日擇可為守者衆皆推璋璋  
固稱李師夔於是以璋為節度副使累遷鴻臚卿丁母  
憂起復山西路都轉運副使加衛尉卿從伐宋衆爭趨

貨貨璋獨載書數千卷而還太行賊陷潞州殺其守姚  
璠官軍討平之命璋權知州事璋至招復逋逃賑養困  
餓收橫屍葬之民皆安輯初賊黨據城潞之軍卒當緣  
坐者七百人帥府牒璋盡誅之璋不從帥府召璋呵責  
且欲殺璋璋從容對曰招亡撫存璋之職也此輩為賊  
所脅初無叛心故招之復來今欲殺之是殺降也苟利  
於眾璋死何憾帥府怒解因召潞軍曰吾始命戮汝今  
汝使君活汝矣皆感泣而去朝廷聞而嘉之拜左諫議

大夫知潞州事百姓為之立祠移知忻州改同知太原  
尹加尚書禮部侍郎時介休人張覺聚黨亡命山谷鈔  
掠邑縣招之不肯降曰前降者皆被殺今恐誘而殺我  
必得侍郎沈公一言乃無疑於是命璋往招之覺即日  
降轉吏部侍郎西京副留守累遷鎮西軍節度使天德  
元年以病致仕卒子宜中天德三年賜楊建中榜及第  
劉彥宗字魯開大興宛平人其先六世仕遼相繼為宰  
相父霄至中京留守彥宗擢進士乙科天祚走天德秦

晉國王耶律聶瑋自立于燕擢彥宗留守判官蕭妃攝  
政遷簽書樞密院事太祖至居庸關蕭妃自古北口邀  
去都監高祿送款于太祖太祖駐蹕城南彥宗與左企  
弓等奉表降太祖一見即器遇之俾復舊職遷左僕射  
使宣慰張覺太祖還上京留宗翰都統軍事彥宗佐之  
及張覺敗奔于宋衆推張敦固為都統攻之不下乃以  
彥宗同中書門下平章事知樞密院事佐宗望軍宗望  
方圖攻取凡州縣之事委彥宗裁決天會二年詔彥宗

遣使諭中京兩路務勸稼穡其官民犯在降附前者勿

論未幾大舉伐宋彥宗畫十策詔兼領漢軍都統

按大金國

志天會三年宗翰宗望分道南仗東路之軍建樞密院於燕山以劉彥宗主院事西路之軍建樞密院於雲中

以事立愛王院事蓋即此時也

師還宗望分將士屯安肅雄霸廣信之

境留棟摩彥宗於燕京節制諸軍明年再伐宋已圍汴

京彥宗謂宗翰宗望曰蕭何入關秋豪無犯惟收圖籍

遼太宗入汴載路車法服石經以歸皆令則也二帥嘉

納之六年卒追封鄆王正隆二年例降封開府儀同三

司大定十五年追封充國公諡英敏子苦萼

苦彥宗次子幼時以廕隸閣門不就去從學遼末調兵  
苦在選中遼兵敗左右多散亡選苦為扈從授左承制  
遼主西奔蕭妃攝政賜苦進士第授尚書左司員外郎  
寄班閣門天輔七年太祖取燕苦從其父兄出降遷尚  
書左司郎中授殿中少監太祖崩宗夏遣使弔慰凡館  
見禮儀皆苦詳定遷衛尉少卿授西上閣門使仍從事  
元帥府凡約束廢置及四方號令多從苦經畫累遷至



禮部侍郎改彰信軍節度使權簽中書省樞密院事天  
眷二年改左宣徽使熙宗幸燕法駕儀仗皆討論者為  
多皇統元年假中書侍郎充江南封冊使至臨安宋人  
勝其居曰行宮皆曰未受命而曰行宮非也請去勝而  
後行禮宋人服其有識乃厚賄之奉金珠三十餘萬皆  
不之顧六年按本紀皇統六年以劉苦為行臺尚  
書右丞相此訛作五年謹改正

書右丞相兼判左宣徽使事留京師或請釐草河南官  
吏之濫雜者皆曰今撫定未久姑收人心奈何為是紛

更遂仍其舊七年帥府議於館陶築三城有警即令北  
軍入居之答曰今天下一家孰為南北設或有變軍人  
入城獨能安耶初以河外三州賜夏人或言秦之在夏  
者數千人皆願來歸諸將請約之答又言三小州不足  
為輕重恐失朝廷大信並從答議陝西邊帥請完沿邊  
城郭以備南寇答曰我利車騎而不利城守今城之則  
勞民而結怨况盟已定豈可妄動遂罷之九年拜司空  
封吳國公天德初封滕王進封鄭王未幾以疾求解政

務授燕京留守進封曹王居數月乞致仕苦自為宣徽使以能得悼后意致位宰相海陵即位意頗鄙之及苦求致仕詔畧曰不為暗於臨事不為諂於事君未許告歸姑從解職苦因慚懼而死子仲誨

仲誨字子忠宰相苦之子皇統初任授忠勇校尉九年賜進士第除應奉翰林文字海陵嚴暴臣下應對多失次嘗訪問時政仲誨從容敷奏海陵稱賞之大定初遷待制詔與左司員外郎富察富色克廉問所過州縣還奏

稱旨累遷翰林直學士改棣州防禦使馱次縣捕盜數  
十人詣州欲以全獲希賞仲誨疑其有寃緩其獄擇老  
穉者先釋之未幾乃獲真盜入為禮部侍郎兼太子左  
諭德遷詹事帝曰東宮講書或論議間當以孝儉德行  
正身之事告之頃改御史中丞十四年為宋國歲元使  
宋主欲變親起接書之儀遣館伴王抃來議要以必從  
仲誨曰使臣奉命修好信約所載未敢輒變卒用舊儀  
成禮而還遷吏部尚書轉太子少師仍兼御史中丞坐

失糾舉大長公主事削一階十九年卒仲誨立朝峻整  
容色莊重前後為東宮官多進規戒顯宗每見仲誨特  
加禮敬云

時立愛字昌壽涿州新城人父承謙以財雄鄉里歲饑  
發倉廩賑貧乏假貸者與之折券遼太康九年立愛中  
進士第累官御史中丞遷遼興軍節度使兼漢軍都統  
太祖已定燕京使平州人韓詢持詔招諭平州立愛使  
人來送款詔曰朕親巡西土號令所加城邑皆下爰嘉

忠款特示優恩大小官員皆充舊職諸囚配隸並從釋  
免時遼主尚在天德平州雖降民心未固吳王和勒博  
軍所在保聚薊州已降復叛民間流言立愛雖開諭而  
不肯信乃上表乞下明詔遣官分行郡邑宣諭德意他  
日兵臨于宋討逆撫順兵不勞而天下定矣帝覽表嘉  
之詔答曰卿始率吏民歸附復條利害悉合朕意山西  
部族緣遼主未獲恐陰相連結故遷處於嶺東西京人  
民既無異望皆安堵如故已諭諸部及軍帥約束兵士

秋豪有犯必刑無赦今遣沃赫阿里等為卿副貳以撫斯民其告諭所部使知朕意其後以平州為南京用張覺為留守時立愛遂去平州歸新城太祖以燕薊與宋新城入于宋宋累召立愛立愛見宋政日壞不肯起戒其宗族不得求仕及宗望再取燕山立愛詣幕府上謁拜同中書門下平章事任其子姪數人從軍數年謀畫居多封陳國公表求解機務不從九年為侍中知樞密院事久之加中書令天會十五年致仕加開府儀同三

司鄭國公卒于家

韓企先燕京人九世祖知古仕遼為中書令徙居柳城  
世貴顯乾統間企先中進士第回翔不振都統果定中  
京擢樞密副都承旨稍遷轉運使宗翰為都統經畧山  
西表署西京留守天會六年同中書門下平章事知樞  
密院事七年遷尚書左僕射兼侍中封楚國公十二年  
為尚書右丞相召至上京時方議禮制度損益舊章企  
先博通經史知前代故事或因或草咸取折衷企先為



相密謨顯諫彌縫闕漏專以倍植獎勵後進為己任一  
時臺省多君子宗翰宗幹雅敬重之世稱賢相高皇統  
元年封濮王六年卒大定八年配享太宗廟庭十一年  
將圖功臣像于衍慶宮帝以前後漢人宰相無能及企  
先者詔置功臣像中以勸後人十五年謚簡懿子鐸終  
順天軍節度使

鄺瓊字國寶相州臨漳人補州學生宗宣和間盜賊起  
瓊乃更學擊刺挽強試弓馬隸宗澤軍尋告歸括集義

軍七百人復從澤澤署瓊為七百人長澤死調戍滑州時宗望伐宋將渡河戍軍亂殺其統制趙世彥推瓊為

主瓊因誘眾勸王行收兵比渡淮有眾萬餘宋主以為

楚州安撫使

按續通鑑時瓊降于劉光世

淮南東路兵馬鈐轄累遷

武泰軍承宣使未幾率所領步騎十餘萬降于齊

按續通鑑

戴瓊後與主德同隸岳飛麾下會飛乞終喪張浚以王德為都統鄺瓊副之德與瓊素不相下交訴于呂社社

密奏罷瓊兵瓊大怒怒奔全軍四萬人渡淮降劉豫呂社遇害本傳畧而不載

授靜難軍節度

使知拱州齊國廢以為博州防禦使用兼遷驃騎上將

軍宗弼復河南以瓊為山東路弩手千戶知亳州事宗弼再伐江南以瓊素知南方山川險易召至軍與計事問以江南成敗瓊曰江南軍勢怯弱皆敗亡之餘又無良帥吾以大軍臨之彼君臣且心破膽裂何以禦我既而江南果稱臣宗弼喜瓊為知言初瓊去亳未幾宗兵陷亳以州人宗超守之及大軍至超以州事委幹轄衛經而遁去帥府使人招經經不下及城潰百姓惶懼待命瓊請於元帥曰城所以不下者凶豎劫之也民何罪

願慰安之因止戮經而釋其州人復命瓊守亳凡六年  
亳人德之歷鎮武寧秦寧軍遷歸德尹貞元元年加金  
紫光祿大夫卒于官

李成字伯友雄州歸信人宋宣和初試弓手挽強異等  
累官淮南招捉使聚眾為盜鈔掠江南宋遣兵破之成  
遂降劉豫累除知開德府從大軍伐宋齊廢再除安武  
軍節度使成在降附諸將中最勇鷙號令甚嚴眾莫敢  
犯臨陣身先諸將士卒未食不先食有病者親視之不

持雨具雖沾濕自如也有告成反者宗弼察其誣使成  
自治成杖而釋之以此士樂為用所至克捷宗李興據  
河南府成引軍入孟津興率眾薄城鼓譟請戰成不應  
日下晁興士卒倦且飢成開門急擊大破之興走漢南  
成遂取洛陽嵩汝河南平宗弼奏成為河南尹都管押  
本路兵馬嘗取官羨粟充公費坐奪兩官解職正隆間

起為真定尹封濟國公卒

按宗史建炎二年河北京東  
捉殺使李成叛四年請降于

江州以為四川鎮撫使已而復叛張俊累敗之遁歸劉  
豫紹興九年以成在順昌恐復為亂諭淮寧蔡州將士

募人擒斬之與本傳不符附識於此

孔彥舟字巨濟相州林慮人亡賴不事生產避罪之汴

占籍軍中生事繫獄說守者解其縛乘夜踰城逃去宋

靖康初應募累官京東西路兵馬幹轄

續通鑑作東平軍校

聞大

軍將至山東遂率所部劫掠居民渡河南去宋人復招

之以為沿江招捉使彥舟暴橫不奉約束宋人將以兵

執之走之齊

按宋史建炎二年孔彥舟叛犯黃州詔諭降之以為湖北捉殺使後累官至安撫使

反覆不常紹興二年叛降劉豫與本傳稍異

從劉麟伐宋為行軍都統改行

營左總管齊國廢累知淄州從宗弼取河南克鄭州破  
孟邦傑於登封授鄭州防禦使討平太行車轅嶺賊從  
征江南渡淮破孫暉兵萬餘人下安豐霍邱及攻濠州  
以彥舟為先鋒順流薄城擒其水軍統制邵青遂克濠  
州師還累官工兵部尚書河南尹封廣平郡王正隆例  
降金紫光祿大夫改南京留守彥舟荒于色有禽獸行  
惟破濠州時諸軍俘獲彥舟號令毋輒殺免者數千人  
人頗以此稱之正隆五年除南京留守死於汴遺表言

伐宋當先取淮南云

徐文字彥武萊州掖縣人徙膠水少時販鹽為業宋季盜起募戰士為密州板橋左十將勇力過人揮巨刀重五十斤所向無前隸王龍圖麾下與夏人戰生擒一將補進武校尉東還破羣賊楊進等轉承信郎宋康王渡江召文為樞密院淮備將擒苗傅及韓世績以功遷淮東浙西沿海水軍都統制大將閻臯與文有隙因譖文有北歸志宋使統制朱師敏襲文文乃率戰艦數十艘



泛海降劉豫豫以文為海密二州滄海都招捉使兼水  
軍統制遷海道副都統兼總管說豫自海道襲臨安豫  
不能用齊國廢元帥府承制以文為南京步軍都虞候  
權馬步軍都指揮使天眷元年破太行賊以本職兼水  
軍統制朝廷以河南與宋除文山東路兵馬幹轄宗弼  
復取河南文破宋將李寶于濮陽孟邦傑于登封宋將  
知軍據河陽文遲明至其城下使別將攻城東北自將  
精銳襲南門城中悉眾救東北乃斬關入城宋軍潰去

追擊敗之破郭清郭遠於汝州鄭州叛復取之擊走宋  
將戚方河南既平充行軍萬戶從宋弼取廬濠等州超  
授武義將軍知濟州在職七年移至泰安軍海陵即位  
錄舊功累遷中都兵馬都指揮使改濬州防禦使海陵  
謀伐宋改行都水監監造戰船於通州東海縣人徐元  
張旺作亂縣人房真等上變州府合兵攻之累月不下  
詔文等率舟師討之文等至東海與賊戰斬首五千餘  
級獲徐元張旺餘衆請降遷定海軍節度使賞房真等

官死賊者皆贈官賜銀絹有差大定二年自陳年老求致仕許之以覃恩遷龍虎衛上將軍卒于家

施宜生字明望邵武人

大金國志作建陽人元好問中州集作浦城人未知孰是博

聞強記未冠入太學宋政和四年擢上舍第授潁州教授王師入汴宜生走江南復以罪北走齊上書陳取宋之策齊以為大總管府議事官失意于劉麟左遷彰信軍節度判官齊國廢入朝為太常博士遷殿中侍御史轉吏部員外郎進本部郎中尋改禮部出為隰州刺史

天德二年參政張浩薦宜生可備顧問海陵召為翰林直學士撰太師梁王宗弼墓銘進官兩階正隆元年出知深州復召為尚書禮部侍郎遷翰林侍講學士四年冬為宋國正旦使宜生自以得罪北走恥見宋人力辭不許宋命張燾館之都亭因間以首邱風之宜生顧其介不在旁為廋語曰今日北風甚勁又取几間筆扣之曰筆來筆來於是宋始警副使耶律必勒哩還以聞生是烹死初宜生困於塲屋遇僧善風鑿謂之曰子面有

權骨可公可卿而視子身之毛皆逆上且覆腕必有以合乎此而後可貴也宜生聞言大喜竟從范汝為於建劔汝為敗變服為傭於秦之吳翁家翁嘗燕客執事咸餽宜生獨遜諸儕撤器有歎聲翁異之識其非真傭也屏人固詰之宜生以實告翁贖之金夜濟淮以北試一日獲熊三十六賦擢第一其後竟如僧言

欽定續通志卷四百二十六

欽定四庫全書

史部

欽定續通志卷四百

三十五

編修臣謝振定覆勘

總校官原任侍講臣王燕緒

欽定四庫全書

欽定續通志卷四百二十七

列傳

金五

完顏希尹

守道 守貞 守能

烏雅富埒琿

持嘉暉

大臭馨

洪果達呼布

富察和珍

瓜爾佳沃里布

王伯龍

高彪

趙元

完顏希尹本名古紳罕都之子也自太祖舉兵常在行陣與諸將征伐皆有功金初用契丹字太祖命希尹撰本國字備制度希尹乃依倣漢人楷字因契丹字制度合本國語製女真字書成太祖大悅命頒行之謂之女真大字後熙宗亦製女真字謂之小字與希尹所製俱行用遼人達魯和尚伊勒希棄中京走希尹與都爾古訥羅索伊都襲之降其旁近人民而還宗翰駐軍北安使希尹經略近地獲遼護衛耶律實納埒大破遼兵於



古北口遂與宗翰至奚王嶺期會於羊城灤宗翰襲遼  
帝于五院司希尹為前驅所將纔八騎與遼主戰一日三敗  
之明日希尹得降人瑪展言遼主在漠北委輜重將奔  
西京追至白水灤南遼主以輕騎颺去遂降西京使  
芬徹守之希尹至伊實部不及遼主而還宗翰入朝希  
尹權西南西北兩路都統時夏人已受盟遼主已獲耶  
律達實自立而夏國與羅索書責諸帥棄盟軍入其境  
多掠取者希尹上其書且奏夏人約達實取山西諸郡

盟不可信帝命嚴備之及大舉伐宋希尹為元帥右監  
軍師還賜希尹鐵券從宗翰伐宋追宋主于揚州後與  
宗翰俱朝京師請立熙宗為儲嗣熙宗即位希尹為尚  
書左丞相兼侍中加開府儀同三司天眷元年乞致仕  
不許罷為興中尹二年復為左丞相兼侍中俄封陳王  
與宗翰共誅宗磐宗雋時熙宗未有皇子嫉希尹者譖之  
竟賜死并殺右丞蕭慶及希尹子同修國史

熙宗紀  
作昭武

大將  
軍

巴達符寶郎滿達皇統三年帝知希尹無罪贈儀

同三司邢國公改葬之天德三年追封豫王正隆二年  
例降金源郡王大定十五年諡貞憲孫守道守貞守能  
守道本名實納埒以祖古紳功擢應奉翰林文字皇統  
九年同知盧龍軍節度使事歷獻祁濱薊四州刺史世  
宗幸中都過薊父老遮道請留再任遷昭毅大將軍授  
左諫議大夫內族晏以恩舊拜左丞相守道諫曰陛下  
初即位邊警未息方大有為之時恐晏非其材必欲親  
愛若厚與之祿俾勿事事乃授以太尉致仕

按照宗紀  
大定元年

十月晏拜左丞相十一月兼都元帥二年四月命為太尉七月致仕事非出自一時傳特類叙之以誌轉圜之

美世宗欲賞扈從將士而帑藏空竭議貸民財守道曰人罹虐政方喜更生今仁恩未及而徵斂遽出如羣望何寧出宮中所有無取於民遂從其言契丹叛遼東明安穆昆或附從之朝議欲徙之內地守道極陳其不可右副元帥默音將兵討賊不即擊守道力言於朝詔遣布薩忠義赫舍哩志寧往代之東方以平大定二年宮中十六位大凡事完葺時已入夏頗妨民力守道諫而

罷未幾改太子詹事兼右諫議大夫馳驛規畫山東兩路軍糧及賑民饑守道籍大姓戶口限以歲儲使盡輸其贏入官復給其直以是軍民皆足拜參知政事兼太子少保懇辭不許時契丹餘黨未附者尚衆北京臨潢秦州民皆不安詔守道佩金符往安撫之給羣牧馬千匹以備軍用守道招致契丹呼敦紐赫等內附民以寧息進尚書左丞兼太子少師嘗從獵近郊有虎傷獵夫帝欲親射之守道叩馬極諫而止俄拜平章政事遷右

丞相監修國史復遷左丞相授世襲穆昆二十年修熙宗實錄成帝因謂曰卿祖古紳行事有未當者皆不為隱真直筆也進拜太尉尚書令改授尚書左丞相未幾乞致仕不許二十五年坐擅支東宮諸皇孫食廩奪官一階尋改兼太子太師特錄其子珪襲穆昆充符寶祇候章宗為原王詔習騎鞠守道諫曰哀制中未可帝曰此習武備耳自為之則不可從朕之命庸何傷乎然亦不可數也二十六年懇求致仕優詔許之特賜晏於慶

春殿帝手飲以卮酒錫與甚厚以其子珪侍行又賜次子璋進士第明昌四年卒太常議諡曰簡憲帝改曰簡靖益重其能全終始云

守貞本名蘇頁貞元二年襲祖古紳穆昆大定初充符寶祇候授通進除彭德軍節度副使遷北京留守移上京坐娶安置契丹戶民女杖一百除名二十五年起為西京警巡使世宗愛其剛直授中都左警巡使遷大興府治中進同知政同知西京留守事御史臺奏守貞治

有善狀世宗因謂侍臣曰守貞材能勝其凡它日可用也章宗即位召為刑部尚書兼右諫議大夫守貞與脩起居注張暉奏言皇帝視朝不令臣等侍立凡有聖訓及所議政事臣等無緣得知何所記錄何所開說似非設官之義帝從之尋為賀宋生日使還拜參知政事帝新即政銳意於治嘗問漢宣帝綜核名實之道守貞誦樞機周密品式詳備以對帝曰行之果何始守貞曰在陛下厲精無倦耳久之進尚書左丞授上京世襲穆昆



明昌三年夏旱天子下詔罪已守貞惶恐表乞解職乃  
出知東平府事命參知政事瓜爾佳衡諭之仍賜金幣  
廐馬以寵其行它日右丞劉瑋曰方今人材無出守貞  
者淹留于外誠可惜也帝默然尋改西京留守四年召  
拜平章政事封蕭國公賜玉帶舊制監察御史八員漢  
人四員皆進士女真四員則文資右職參注守貞以監  
察乃清要之職請一體純用進士一日奏事次帝問司  
吏移轉事守貞曰今吏權重而積弊深移轉為便帝嘗

歎文士出倫者難得守貞曰培養久則人材自出因論  
國家選舉之法又言節用省費之道竝嘉納焉先是帝  
誅鄭王允蹈等以其家產均給諸王又以董壽為宮籍  
監都管勾竝下尚書省議守貞奏陛下欲以允蹈等家  
產分賜懿親恩命已出恐不可改如董壽罪人也特恩  
釋之已為幸矣不宜更加爵賞帝是其言自明昌初北  
邊屢有警或請出兵擊之帝曰今方南議塞河而復用  
兵於北可乎守貞曰彼屢突軼吾圍今一懲之後當不

復來帝因論守禦之法守貞曰惟有皇統以前故事捨此無法耳守貞讀書通法律明習國朝故事金有國七十年禮樂刑政因遼宋舊制章宗即位乃更定脩正為一代法其儀式條約多守貞裁訂故明昌之治號稱清明又喜推轂善類接援後進朝廷正人多出入門下時張汝弼妻高圖幹獄起帝意並疑鎬王允中右諫議大夫賈守謙上疏陳時事思有以寬解帝意右拾遺路鐸繼之言尤切直帝不悅守貞持其事獄久不決帝疑有

黨出守貞知濟南府事董師中路鐸等皆補外俄以在  
政府日嘗與近侍竊語宮掖事而妄稱奏下帝命有司  
鞫問守貞款伏奪官一階解職遣中使持詔責諭之仍  
以守貞不公事宣諭百官於尚書省承安元年降授河  
中防禦使五年改博勒和扎薩克

按金地理志本唐古  
部族承安三年改今

名節度使遷知都府事時南鄙用兵帝以山東重地須

大臣安撫乃移知濟南府卒帝聞而悼之敕有司致祭  
賻贈禮物依故平章政事富察通例諡曰肅守貞剛直

明亮帝嘗與泛論人材輒述其心術行事臧否無少隱  
故為胥持國輩所忌竟以直罷後趙秉文上書言願陛  
下進君子退小人帝問君子小人謂誰秉文對君子故  
相完顏守貞小人今參知政事胥持國其為天下推重  
如此

守能本名呼喇累官商州刺史正隆末宋人陷商州守  
能被執大定五年宋人請和完顏仲為報問國信使求  
守能遂及新息縣令完顏按辰俱歸至京師入見詔給

舊官之俸十九年為西北路招討使時詔徙幹罕餘黨于臨潢泰州伊喇密拉嘗從幹罕其弟齋達當徙偽稱身亡以馬賂守能固匿不遣又受賕補賽音蕃部通事事覺是時烏庫哩實壘部族節度副使實紳安巴杖殺無罪鎮邊明安尚書省俱奏其事詔招討司官向進良馬橐駝鷹鷂等物假此率斂自今竝罷之因責守道曰守能自刺史躡遷招討外官之尊無以踰此前招討朮克丹以貪墨伏誅守能豈不知乃敢如此爾之親弟何

不先訓戒之也尚書省奏守能兩賊俱不至五十貫抵  
罪實紳安巴解見居官并解世襲穆昆帝曰此舊制之  
誤居官犯除名者與世襲併罷之非犯除名者勿罷遂

著于令詔守能杖二百除名

按世宗本紀大定二十年罷招討使進馬駝等物二

十一年守能除名本傳俱繫之十九年特總其事之前後而書之耳謹識

烏雅富埒琿海蘭路烏克敦山人父巴古喇龍虎衛上  
將軍富埒琿薺刀絕人能挽強射二百七十步與兄呼  
沙呼俱以勇健隸棟摩軍攻黃龍府力戰有功棟摩敗

于兔耳山張覺復整兵來諸將皆不敢戰富埒瑄登山望之紿云敵少急擊可破若入城不可復制諸將遂合戰破之郭藥師蔡靖以燕京降富埒瑄率九十騎先伺察城中居民去就遂將漢兵千隸完顏蒙克攻真定進攻贊皇取之獲人畜甲仗萬餘汴城破日已暮宋人猶力戰槍刺中富埒瑄手戰益力遂敗宋軍睿宗為右輔元帥承制以富埒瑄為河北西路兵馬都總管及宋主在揚州富埒瑄與蒙克將萬騎襲之宋主已渡江破其



餘兵後與錫默阿里俱從宗弼取江寧隴明州而歸  
天眷二年授鎮國上將軍除安國軍以疾去官皇統六  
年授世襲穆昆起為延安尹尋致仕海陵遷中都起為  
歸德尹令馳驛之官淹留踰限復聽致仕召赴京師至薊  
州見海陵于獵所射獲一狐海陵嘉其老而健捷賜以  
御服封幽國公除太子少師進太子太保改真定尹入  
判大宗正事從海陵伐宋以本官行右領軍副都督事  
大定二年至中都謁世宗除東京留守時年七十三矣

帝曰卿宿將久練兵事年雖老精神不衰因命到官每旬月一視事進階開府儀同三司仍封幽國公是歲卒十八年孫扎昆遷廣威將軍襲烏克敦山世襲明安并親管穆昆

持嘉暉字仲明其先附於遼居張皇堡故嘗以張為氏後家來州暉體貌雄偉慷慨有志略少遊鄉校遼季以

破賊功授禮賓副使領來隰遷潤四州

按遼史地理志中京道來隰遷

潤四州按環無萊州本傳訛作萊謹改

屯兵天輔六年降仍命領其衆從棟



傅城力戰如是連月諸軍四面合攻遂克之加桂州  
管内觀察使留撫河間時居民皆為軍士所掠老幼存  
者亡幾暉下令軍中聽贖還之從睿宗攻下青州復從  
棟摩攻維州暉督其裨校先登城中積蒿艾乘風縱火  
發機石暉率將士衝冒而下力戰敗之軍還復以三十  
騎破敵于范橋帥府承制加靜江軍節度使進攻城中  
礮出幾中暉暉益奮攻卒破其城又從克泗州還屯汶  
陽破賊衆于梁山灤獲舟千餘移軍攻濟州敗降之暉

約東軍士無秋豪犯自是曹單等州皆聞風而下從攻  
壽春歸德及渡淮為先鋒連敗重敵于秀州蘇州遂至  
餘杭通糧餉治橋道暉之力為多軍還載資治通鑑版  
以歸大軍過江寧徙其官民北渡時暑多疾疫老弱轉  
死道路知府陳邦光訴于宗弼怒將殺之暉曰此義士  
也力救之得免富平之戰暉左右翼遇潭而敗睿宗念  
其前功杖而釋之師至熙河暉別降諸寨及吐蕃酋長  
并民戶萬五千餘蘭州叛與鄂勒博等攻下之獲河州

安撫使白常熙河路副都總管劉惟輔以獻

按續通鑑云金人侵

熙河副總管劉惟輔死之而此云獲以獻者通鑑與惟輔之志本傳紀暉之績也

還攻慶陽兩

敗重敵殺其將戴巢師還遷歸德軍節度使宋州舊無  
學暉為營建學舍勸督生徒肄業者復其身屬縣民家  
奴王夔者嘗業進士暉以錢糧五十萬贖之使卒其業  
夔後至顯官密州吏龐乙卒於官其孤貧不克葬暉為  
營治且資給其家既廢齊為安化軍節度使天眷二年  
復河南宋人乘間陷海州帥府以登萊沂密四州委暉

經畫敵無敢窺其境者轉定海軍尋改濟南尹累遷光祿大夫俄以罪罷久之起鎮昌武軍天德二年遷南京留守改河南路統軍使授世襲明安封河郡王尋拜平章政事封戴王正隆降王爵為樞密副使降封榮國公卒大定間諡武康子師直登進士第

大臭本命托卜嘉其先遼陽人世仕遼有顯者太祖伐遼遼人徵兵臭在選中遼兵敗臭走寧江城破復逃為軍士所獲太祖問其家世因收之收國二年為東京奚

民穆昆時初破高永昌東京旁郡未盡服屬使臬伺察  
反側有聞必達太祖以為忠實授明安兼同知東京留  
守事取中西兩京隸棟摩軍遼軍二十萬來戰使以本  
部守營臬堅請出戰既合戰棟摩軍少却遼兵躡之臬  
麾兵橫擊殺數百人由是顯名天會三年宗望伐宋欲  
攻信德府恐不能亟下議未決臬獨選善射者射其城  
樓別以輕銳潛登樓角遂克其城軍至瀋州宋人已燒  
河橋宗望下令先濟者功為上臬捕得十餘舟使勇悍



者徑度擊其守者而奪其戍柵由是大軍俱濟明年為  
河路都統已克河間棟摩怒其不早降縱軍大掠臬諫  
止之已掠者官為贖還除河間尹從攻襲慶府先一日  
臬命軍士預備畚鍤及薪既傳城諸將方經營攻具未  
鳴鼓臬軍有素備遂先登宗弼伐江南濟淮宋將時康  
民率兵十七萬來拒臬率本部從擊敗之復以騎二千  
與當堪擊敗淮南賊十萬王善來降將渡江臬軍先渡  
舟行去岸尚遠宋列兵江口臬視其水可涉乃麾兵捨舟

趨岸疾擊之宋兵走大軍相繼而濟俄遇杜充兵於江寧之西臭與呼拉布擊走之師還留臭為揚州都統經略淮海高郵之間再為河間尹兼總河北東路兵馬十一年入見遷太子太保改元帥右都監齊國廢臭守汴京天眷三年罷漢渤海千戶穆昆以臭舊臣獨命依舊世襲千戶是歲拜元帥右監軍累進左監軍天德二年改右副元帥進行臺右丞相海陵疑左副元帥薩里罕以為行臺左丞相使臭伺察之詔軍事不令薩里罕與

聞薩里罕不知海陵意旨每與臯爭軍事遂與臯有隙  
海陵竟殺薩里罕召臯入朝拜尚書右丞相封神麓郡  
王四年請老為東京留守貞元三年拜太傅領三省事  
累封漢國王是歲卒贈太師晉國王諡傑忠正隆降王  
爵贈太傅梁國公子磐

磐本名富色克累官登州刺史襲明安大定三年除嵩  
州刺史從布薩忠義伐宋有功五年召為符寶郎遷拱  
衛直都指揮使初磐以伐宋功進官一階磐心少之頗

形于言帝聞之下吏按問改左衛將軍詔求良弓磐多  
自取又護衛入直者輒以己意更代護衛羅索告其事  
詔點檢司詰問磐有妹在宮中為寶林磐屬內侍僧兒  
員思忠言于寶林使以無罪訴于帝帝怒杖僧兒一百  
磐責隴州防禦使遷武寧軍節度使坐事除名起為韓  
州刺史改邠州復坐事削四官解職

洪果達呼布世居錫馨水從破寧江取咸州平東京路  
及諸山寨柵皆有功從瑪奇破遼將和尚節使兵七千

於上京復破納延軍二萬再從瑪奇遇敵於阿林甸瑪奇被創不能戰達呼布率兵擊敗之從攻回鶻城破其兵九萬敗瑪勒噶直薩兵於山後又敗扎古雅兵三千獲其家屬而還攻平州張覺烏春被圍於西山達呼布引兵救之解其圍并獲糧五千斛招降戶口甚衆天會間大軍伐宋達呼布從取瀋開德大名及濟南高唐棣密等州皇統間以功襲穆昆移屯於壽光縣界為千戶六年授世襲千戶棣州防禦使卒

富察和珍安春水人年十八從軍其父塔斯死襲為穆  
昆天輔間夏兵三萬出天德路和珍從羅索迎戰以兵  
三百敗敵二千天會三年大軍攻太原城中兵萬餘出  
戰和珍以所領千戶軍擊之復敗敵兵三萬於榆次六  
年從羅索攻京兆屢與宋人接戰皆有功七年取邠州  
遇宋人二十餘萬我軍右翼少却時和珍為左翼千戶  
摧鋒陷陣敵遂敗去敗張浚于富平復有功十二年

宋按

史高宗紀紹興四年四月甲辰闕師古叛以洮泥二州  
降偽齊考宋紹興四年為金天會十二年本傳訛作十

三年  
謹改擊關師古於臨洮又從破德順秦鞏臨洮河蘭等州授

德順州刺史改隴州防禦使鳳翔尹卒

瓜爾佳沃哩布南圖琿河人徙天德父溫屯討烏春烏木罕有

功沃哩布隸羅索帳下攻係遼女真招降達哈藩照蘇等從

羅索救烏楞古于咸州

按太祖紀烏楞古敗遼軍於咸州西完顏羅索克咸州北訛作咸州謹據

改  
敗遼兵于雅勒呼城遼軍營遼水沃哩布以五穆昆軍夜

擊之遼軍驚潰殺獲幾盡從幹魯伐高永昌以四十騎伏于

津要獲生口因盡知永昌虛實太祖嘉之永昌駐軍於兔

兒陀先據津要軍不得渡沃哩布與薩巴射殺其先鋒二人  
永昌衆稍却大軍遂渡遼水及攻廣寧復與持嘉和木歡各  
領所部突入其陣大軍繼之遂拔廣寧太祖攻臨潢沃哩布面  
被重創奮擊自若遼王杲已取中京沃哩布以四十騎覘  
敵獲遼喉舌人因知遼主所在後從都統幹魯定雲中從  
宗翰屯應州遼軍在近境沃哩布以所部擊敗之從宗望伐  
宋宋安撫使蔡靖詣降羅索攻陝西諸郡往往復叛沃  
哩布攻敗之敗張浚軍于富平沃哩布先登遂以先鋒



攻下蘭州加昭武大將軍授世襲明安累官布塔布部  
族節度使以老致仕封芮國公沃哩布多智略膂力過  
人雖甚老勇健不少哀大定初劇賊嘯聚出特布闊沃  
哩布率鄉里年少擊之賊黨潰事聞賞賚甚厚二十六  
年卒一百有五歲

王伯龍瀋州雙城人遼末聚黨為盜天輔二年率衆二  
萬及其輜重來降授世襲明安知銀州兼知雙州四年

按太祖本紀天輔四年五月攻遼上京上  
京即臨潢府也本傳訛作三年謹據政

太祖攻臨潢

伯龍與韓慶和以兵護糧餉慶和將兵行前伯龍從糧

居後遇遼兵五千餘邀於路伯龍率輓夫擊敗之護馬

五十匹六年

按遼史保大二年正月乙亥金克中京遼保大二年金天輔六年也本傳誤作四年

謹據從攻下中京并克境內諸山寨為靜江軍節度留

後天會元年

按本紀太宗以天輔七年九月改元十一月命宗望統領棟摩兵討張覺則此處應

作天會元年為是本傳訛作五年又不冠以年號謹改正真授節度使從宗望討張

覺於平州伯龍先登手殺數十百人遷右金吾衛將軍

白河之戰伯龍突其左軍宋人遂敗宗望伐宋伯龍為

先鋒次保州破敵五萬招降新樂軍民十餘萬大軍圍  
汴數敗宋何臬軍及破汴伯龍以治攻具有功進破孔  
彥舟鄴瓊衆三萬於洺州是年同知保州兵馬安撫司  
事將兵數千攻拔北平復取保州河間睿宗經略山東  
伯龍從攻青州城中兵夜襲其營伯龍不及甲獨挺刀  
拒敵擊殺數十人已而軍士皆甲殺傷宋兵不可勝計  
及下青州論功第一六年還攻莫州降之加太子少保  
莫州安撫使破李固寨衆十餘萬於濮州濮城守城中

鎔鐵揮我軍攻之不能尅伯龍被重甲首冠大釜提  
鎗先登殺守陣者二十餘人大軍相繼而上遂尅之進  
攻徐州復先登克徐宿邳三路軍馬都統敗高托山之  
衆十五萬於清河擊走韓世忠於邳州與大軍會宿遷  
追世忠至揚州還攻泗州守將以城降弋軍磁陽破陳  
宏賊衆四十萬餘破黃戩於單州進攻歸德軍帥遣伯  
龍立攻具伯龍從二十餘騎行視地形城中忽出兵千  
餘欲生得伯龍伯龍縱騎馳之敵兵亂墜隍而死者幾

二百人破王善之衆於巢縣及取廬州和州伯龍之功  
居多軍渡采石擊敗岳飛劉立路尚等岳獲芻糧數百  
萬計還過真揚道遇酈瓊韓世忠軍敗之復為莫州安  
撫政知澤州平太行羣賊天眷元年為燕京馬軍都指  
揮使從元帥府復收河南權武定軍節度使兼本路都  
統宋兵據許州伯龍擊之走招復其人民是年秋平秦  
安叛卒張貴皇統元年以本部從宗弼南伐攻破濠州  
而還三年為武定軍節度使改延安尹寧昌軍節度使

天德三年改河中尹徙益都尹封廣平郡王卒正隆間  
例贈特進定國公

高彪本名昭和碩辰州渤海人祖安國遼興辰開三鎮節  
度使父祿格左承制官至刺史彪始生其父以術者言  
其時日不利於己欲不舉其母為營護居數歲竟逐之  
彪匿於外家及遼人調兵祿格已老當從軍悵然謂所  
親曰吾兒若在可勝兵矣所親具以實告因代其父行  
戰於珠赫店遼兵敗走彪獨力戰軍帥見之曰此勇士

也令生致之韓魯攻東京祿格率其鄉人迎降以為榆河州千戶久之告老彪代領其衆都統杲攻中京彪領穆昆從韓魯破遼將克爾叟及韓慶民於高惠之境已而駐軍武安克爾叟以勁兵二萬來襲從韓曾出戰與所部皆去馬奮擊敗之美人負險拒命彪屢戰有功從宗望攻平州徇地西北道招降石家山寨再從宗望伐宋師次真定彪率兵士七十人臨城築甬道城中夜出兵焚攻具彪擊走之大軍圍汴以五十騎屯於東南水門

再敗宋兵師還屯鎮河朔復破敵於霸州擒其裨將祝昂河間夜出兵二萬襲營虜率三穆昆兵敗之天會五年授靜江軍節度使壽州刺史明年伐宋從帥府徇地山東攻城克敵數被重賞七年師至睢虜以所部招誘京西人民次柘縣其官吏出降虜獨與五十餘騎入城中三千餘人復叛虜率衆力戰敗之撫安其民而還從梁王宗弼襲宋主至杭州師還宋將韓世忠以戰艦數百扼於江北宗弼引而西將至黃天蕩敵舟三十餘來



逼南岸其一舟載兵士二百餘先至彪以鈎拽之率勇士數十躍入其舟所殺甚衆餘皆溺死明年從攻陝西

師至寧州彪與宗人昂率兵三千取廓州

按金地理志無廓州考廣

韻係漢西羌地前涼為隄河郡周為廓州其地與隴右相近

始至有來降者言城東

北隅守兵將謀為內應彪即夜從家奴以登左右守者覺之彪與從者皆死戰諸軍繼進遂克其城從攻和尚原及仙人關與阿里監護漕糧并戰艦至亳州宋人以舟五十艘阻河路擊敗之擒其將蕭通擊漣水賊寨進

取漣水軍其官民已遁悉招降之彪勇健絕人身先士卒大小數十戰率以少擊衆無不勝捷齊既廢攝滕陽軍以東諸路兵馬都統撫諭徐宿曹單滕陽及其屬邑皆安堵如故改忻州防禦使歷安化安國武勝軍節度使遷行臺兵部尚書改京兆尹封郅國公以憂去官起復為武定軍節度使歸德尹正隆例授金紫光祿大夫久之致仕起復為樞密副使舒國公賜名彪卒諡桓壯彪性機巧通音律人無貴賤皆溫顏接之

趙元字善長涿州范陽人遼天慶八年登進士第仕至  
尚書全部員外郎遼亡郭藥師為宋守燕以元掌機宜  
文字王師取燕藥師降樞密使劉彥宗辟元為本院令  
史天會間同知薊州事有賊殺人橫道官吏圍視莫知  
所為路人耕夫聚觀甚衆元指田中釋耒而來者曰此  
賊也叱左右縛之遂伏僚吏問其故元曰偶得於眉睫  
間耳其後朝廷立磨勘格凡嘗仕宣和者皆除名籍元  
在磨勘中齊國廢置行臺省于汴選元備官屬授行省

兵部郎中宗弼再取河南元皆攝戶部事賦調兵食取  
辦天眷三年為行臺右司員外郎因有殺人當死者行  
臺欲宥之元不從反覆數四勢不可奪乃仰天歎曰如  
殺人者可宥死者復何辜何欲徼已福而亂天下法乎  
行臺竟不能奪改左司員外郎攝吏部事在行臺凡十  
年吏事明敏宗弼甚重之為同簽汴京留守事改同知  
大名尹用廉遷河北西路轉運使歷彰德武勝等軍節  
度使以老致仕卒于家



欽定續通志卷四百二十七